

**AWIG-AWIG  
DESA ADAT LEBAH**



**DESA SUKADANA  
KECAMATAN KUBU  
KABUPATEN KARANGASEM**

## MURDHA CITTA

### Om Swastyastu

Malarapan saking wit sangkaning Ida Sang Hyang Widhi Wasa antuk asung kerta nugraha ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wantah pawakan pasayuban Krama Desa rawuhing kula warga pawongane. Desane kaanghang Bhuwana Agung, pawongannya soang-soang pinaka Bhuwana Alit.

Sotaning Bhuwana Agung, Desane wantah pawakan Bhuwana mahurip jangkep saha Tri Hita Karananya luwire :

- ha. Parahyangan, sahananing kahyangan , penyiwian desa genah ngarcana Ida Hyang Parama Wisesa maka jiwane desane;
- na. Pawongan, krama saha warga desa maka sami mapawakan Bayu Pramana, mawinan desane sida molah maprawerti;
- ca. Palemahan, tanah kakuwuban desa sinanggeh stulaning desane.

Adung petemon bhuwana kalih, larapan santa Jagadhita, sinanggeh murdhaning prayojana pangeriptaning awig-awig Desa adat ring paseban sami krama desa adat.

Pinaka sepat siku-siku pamatut : wastu prasida, prayojanan sami kabeh prasama angidep muwah amagehaken kadi linging awig-awig niki.

**Om Shanti, shanti, shanti, om**

**PIDAGING**

**MAKA BANTANG AWIG-AWIG DESA ADAT LEBAH**

**MURDHA CITTA**

**PRATHAMA SARGAH ARAN LAN WAWIDANGAN DESA**

**DWITYAS SARGAH PATITIS LAN PAMIKUKUH**

**TRITYAS SARGAH SUKERTA TATA PAKRAMAN**

Palet 1 Indik Krama

Palet 2 Indik Prajuru/Dulu Desa

Palet 3 Indik Kulkul

Palet 4 Indik Paruman

Palet 5 Indik Druwen Desa

Palet 6 Indik Pamitegep

Kaping 1 Karang lan tegal

Kaping 2 Pepayonan

Kaping 3 Wewangunan

Kaping 4 Wewalungan

Kaping 5 Bhaya

Kaping 6 Penyanggran Banjar

Kaping 7 Investor

**CATURTHAS SARGAH SUKERTA TATA AGAMA**

Palet 1 Indik Dewa Yadnya

Palet 2 Indik Resi Yadnya

Palet 3 Indik Pitra Yadnya

Palet 4 Indik Manusia Yadnya

Palet 5 Indik Bhuta Yadnya

**PANCAMAS SARGAH SUKERTA TATA PAWONGAN**

Palet 1 Indik Pawiwahan

Palet 2 Indik Nyapian

Palet 3 Indik Sentana

Palet 4 Indik Warisan

**SASTHAS SARGAH**

**NGERAKSA KASUKERTAN PURA LAN PRATIMA**

Palet 1 Indik Kasukertan Pura

Palet 2 Indik Kasukertan Pratima

**SAPTAMAS SARGAH**

**WICARA LAN PAMIDANDA**

Palet 1 Indik Wicara

Palet 2 Indik Pamidanda

**ASTAMAS SARGAH**

**NGUWAH-NGUWUHIN AWIG-AWIG**

**SANGETYAD SARGAH**

**SAMAPTA**

**PRATHAMAS SARGAH  
ARAN LAN WEWIDANGAN DESA**

**Pawos I**

- (1) Desa adat puniki mawasta desa adat Lebah
- (2) Jebar kakuwub wewidangannya mawates nyatur :
  - ha. Sisi Wetan (Kangin) : Margi Dalem Cutcut ke pura Desa Lebah
  - na. Sisi Kulon (Kauh) : Pangkung Dalem Tianyar
  - ca. Sisi Lor (Kaja) : Desa Adat Dlundungan
  - ra. Sisi Kidul (Kelod) : Segara
- (3) Desa Adat Lebah kawangun antuk persetujuan atau kesepakatan krama, turmaning kepeh dados 2 (kalih) Banjar adat luire:
  - ha. Banjar Adat Lebah, kepeh dados 3 (tigang) tempekan: tempek kauh, tempek tengah, lan tempek kangin
  - na. Banjar Adat Mekar Sari, kepeh dados 3 (tigang) tempekan: tempek kelod, tempek tengah, lan tempek kaja

**DWITISYAS SARGAH  
PATITIS LAN PAMIKUKUH**

**Pawos 2**

- Desa Adat Lebah ngamanggehang pamikukuh minakadi:
- ha. Pancasila
  - na. Undang-Undang Dasar 1945
  - ca. Tri Hita Karana manut sada cara Agama Hnidu
  - ra. Perda No. 4 Tahun 2019 tentang Desa Adat di Bali

**Pawos 3**

- Luir patitis (tatujon) Desa Adat Lebah luire:
- ha. Mikukuhin miwah ngrajegang Agama Hindu
  - na. Nincapang/nginggilang tata prawerthi magama

- ca. Ngulati tur nincapang kasukertan Desa Adat saha pawongannyane sakala-niskala
- ra. Ngrajegang pamargi sagilik - saguluk, salunglung sabayantaka sajeroning Desa Adat

## TRITIYAS SARGAH SUKERTA TATA PAKRAMAN

### Palet 1 Indik Krama

#### Pawos 4

- (1) Sane kabawos Krama Desa Adat Lebah inggih punika kulawarga sane meagama Hindu saha jumenek jumeneng ring wewidangan Desa Adat Lebah
- (2) Sajaba punika sinanggeh tamiu, sane kabinayang dados kalih inggih punika sane meagama hindu miwah siosan ring meagama hindu (nonhindu)

#### Pawos 5

Papalihan krama desa Adat Lebah wenten 3 (tigang) soroh inggih punika :

- ha. Krama ngarep, kulawarga sane wed utawi pengrawuh saking warga desa siosan saha ajeg pawiwahane
- na. Krama tan ngarep, silih sinunggil kulawarga sane tan ngarep ring desa Adat Lebah inggih punika krama penyada. Krama sane sampun mayusa ngawit ring 65 warsa inucap nyada
- ca. Krama balu, kulawarga ngarep utawi tan ngarep silih sinunggil lanang utawi istri lina, wiadin nyapihan (palas makurenan). Krama balu inucap nenten kesinanggeh mebulu angkep (lepas ayah-ayahan). Krama balu punika sane maduwe oka lanang sampun merabian wau keni ayah-ayahan mamungkul

#### Pawos 6

- (1) Ngawit dados krama desa Adat Lebah :
  - ha. Sangkaning jumeneng ring wewidangan desa Adat Lebah
  - na. Mawiwit pawiwahan ngawit tedun mekrama nyaluk karya (piodalan ring Pura Dalem Lebah-Bukit)
- (2) Panemaya tedun makrama desa katuju nyambut karya piodalan ring Pura Dalem Lebah-Bukit

## Pawos 7

(1) Tategenan krama Desa Adat Lebah, luire :

ha. Krama ngarep, keni urunan miwah ayahan mamungkul

na. Balu ngelisting, lanang wiadin istri (tanpa sentana) lepas ayahan

(2) Krama Desa Adat Lebah kadadosang :

ha. Mapuankid utawi tan tedun luire :

- Ritatkala sungkan
- Matepetin anak sungkan raat
- Maduwe kalayu sekaran
- Sedek wenten ring dura desa
- Lunga sangkaning nedunin acara lan wicara sang angamong rat

na. Nyada, mapiteges lepas ngayah risampun tan mresidayang makarya

ca. Mogpog, ngetut wiadin nutug ayah saha papeson antuk brana manut pararem majeng ring desa Adat Lebah

## Pawos 8

ha. Krama Tamiu patut madana punia ring Desa Adat utawi Banjar Adat manut pararem

na. Krama Tamiu patut polih petias marupa pitulung ring sajeroning katiben pancabaya

## Pawos 9

(1) Wusan dados krama Desa Adat, luire :

ha. Sangkaning pinunas ngaraga, menawi kesah ke dura desa

na. Kenorayang, duaning sampun tan prasida ngesehin solah maprawerti setata mamurug kecaping awig-awig utawi pararem

ca. Wusan makrama desa mapiteges taler wusan makrama banjar utawi wusan makrama banjar mapiteges taler wusan makrama desa mangde sampunang kasinanggeh empak ngelanting

(2) Sang wusan mekrama :

ha. Tan polih pahpahan druwen desa utawi druwen banjar

na. Tan polih pesayuban sajeroning ala ayu

Palet 2  
Prajuru lan Dulun Desa utawi Panglingsir Desa

Pawos 10

- (1) Desa Adat Lebah kaenter antuk Bandesa Adat utawi Kelian Desa Adat
- (2) Banjar Adat kaenter antuk Kelian Banjar Adat
- (3) Tempekan kaenter antuk kelian Tempek
- (4) Bandesa Adat lan Kelian Banjar patut :
  - ha. Mawiwit saking krama ngarep utawi wed
  - na. Maduluran dewa saksi ring pura desa.
  - ca. Keadegang melarapan antuk paruman. Soang-soang 5 (limang) warsa, sejawaning wenten parindikan tios tur dados kecatri (kapilih) malih yening kari kasungkemin krama desa.
- (5) Tata caraning ngadegang utawi nyudi Bandesa Adat lan Kelian Banjar Adat manut perarem
- (6) Bandesa Adat keadegang/kesudi nganutin pemargin dresta desa sane sampun memargi antar saking riin
- (7) Penyanggra/pembantu Bandesa Adat sakadi petajuh, penyarikan, lan petengen dados kesudi saking krama desa lianan sane wenten ring wewidangan Desa Adat Lebah.
- (8) Ngadegang Kelihan Banjar Adat kasudi oleh Prajuru banjar adat soang-soang tur kesungkemin oleh krama banjar adat.

Pawos 11

- (1) Bandesa utawi Kelian Desa Adat kesanggra antuk :
  - ha. Petajuh/pangliman pinaka wakil.
  - na. Penyarikan pinaka juru surat (sekretaris)
  - ca. Petengen/Juru raksa pinaka pangemong druen desa (bendahara).
  - ra. Kasinoman pinaka juru arah ring soang-soang tempekan
- (2) Sajeroning ngenterang sukertan niskala Bandesa Adat mingsinggihang pamangku kahyangan desa.

- (3) Prajuru ngadegang panglingsir utawi Dulu Desa utawi pamucuk sinanggeh Saba desa lan Kertaning desa sane mawiwit saking prajuru lepas, sang wikan pakraman agama, sinanggeh panua kasarengin juru surat lan petengen keambil saking penyarikan lan petengen desa

#### Pawos 12

- (1) Swadharmaning Bandesa Adat luire :
- ha. Ngemargiang sedaging awig-awig miwah perarem desa
  - na. Nuntun tur ngenterang krama rawuhing warga desa ngupati anut patitis
  - ca. Mawosin kalih niwakang pemutus marep ring wicara warga desa
  - ra. Maka duta matemuang bawos ring sapa sira ugi
- (2) Prada Prajuru utawi dulu iwang panglaksana keni pamidanda nikel ring kaiwangan soang-soang krama saha kangkat karariyanang manut pararem

#### Pawos 13

- (1) Patias utawi olih-olihan Prajuru utawi Dulu Desa luire :
- ha. Luput rerampen (pepeson)
  - na. Polih tanding tengah
  - ca. Polih pengewali urunan yening ngangge kas desa sesampune kebagi krama, conto penelas 500 juta kepah krama ngarep
  - ra. Petias siosan manut pararem
- (2) Ngadegang Prajuru lan Dulu Desa ngangge upacara pewintenan ngelantur mejaya-jaya

#### Pawos 14

- (1) Prajuru utawi Dulu Desa kagentosin riantukan :
- ha. Lina
  - na. Wit saking pekayun utawi pinunas ngeraga
  - ca. Kawusang duwaning iwang pamargi manawi nilar sasana

- (2) Nganorayang, ngewusang miwah ngentosin prajuru utawi Dulu patut ring sajeroning paruman tur keingkupin antuk krama desa

Palet 3  
Indik Kukul

Pawos 15

- (1) Kukul ring desa luire :
- ha. Kukul Desa
  - na. Kukul Banjar utawi Tempekan
  - ca. Kukul Sekaa-sekaa
- (2) Tabuh tetepakan kukul Desa :
- ha. Atuludan lambat, tetengeran tedun ngayah
  - na. Atuludan bulus, tetengeran kapanacabayan
- (3) tengeran kukul ring soang-soang bebanjaran :
- ha. Kalih tulud bulus, tetengeran ngerorod (pengantenan)
  - na. Kukul kelayu sekaran (lina)
  - ca. Kukul sangkep
  - ra. Kukul ngayah

Pawos 16

- (1) Kukul Desa utawi banjar tan wenang katepak yening tan sangkaning pituduh prajuru desa, utawi prajuru banjar sawawaning tengeran kepancabhayan.
- (2) Sang nepak tan sangkaning pituduh patut digelis atur supeksa maka buatan penepake, yan tan sapunika, patut sang mamuruh kedanda manut pararem.
- (3) Kukul Sekaa-sekaa, samalih kukul pondokan tan kelugra nyawerin (matehin) ukat utawi tengeran kukul Desa/Banjar, prade mamurug taler kedanda manut pararem.
- (4) Kengin ngemargiang kukul tempekan ritatkala ngayah utawi pesangkepan ring Banjar Adat utawi desa, manut pararem seantukan genah medoh-medohan.

Palet 4  
Indik Paruman

Pawos 17

- (1) Paruman utawi sangkepan ring Desa Adat Lebah, wenten
  - ha. Paruman Desa Adat kawentenang :
    - Nyabran sasih (Rahina Tumpek), maka cihna tanpa arah-arrah, duaning sampun tetep panemaya manut pararem
    - Napkala maka jalaran arah-arrah manut tetujon
  - na. Sangkepan Prajuru utawi dulun desa, kawentenang manut wiguna;
  - ca. Paruman sekaa-sekaa manut kabuatan.
- (2) Paruman utawi sangkepan ring Banjar Adat soang wenten :
  - ha. Paruman Banjar Adat Mekar Sari lan Banjar Adat Lebah.
    - Nyabran sasih (Raina anggarakasih), maka tanpa arah-arrah, duaning sampun tetep panemaya manut pararem
    - Napkala maka jalaran arah-arrah manut tetujon.
  - na. Sangkepan Prajuru utawi sekaa-sekaa kawentenang manut wiguna;
- (3) Paruman Desa Adat utawi Banjar madudonan sekadi ring sor :
  - ha. Prasida lumaksana risampun ketedunin antuk sang patut ngamiletin, kemanggala antuk tengeran kulkul miwah mabusana adat, manut dresta saha tan kalugra makta gegawan saha : tan maren ngarcana ring Ida Bhagawan penyarian saha widi widana miwah cane.
  - na. Tan kalugra ngamedalang bawos gora utawi biota, yan tan asapunika keni pamidanda pacamil kadi dandaning nguman-uman ring paruman;
  - ca. Pamutus babawos beriuik sapanggul (lingkup) punika kamanggehang.
- (4) Prade daging paruman tan kecumponin, mangda Prajuru Desa utawi Banjar ngilikang bawos, saha putusannya mangda kararem antuk krama Desa utawi Banjar malih Prade tan prasida kasungkemin jantos ping tiga, Prajuru Desa utawi Banjar dados nunas bawos ring Kerta Desa manut dudonan luire : kamanggala paingkupan prajuru, ngeraris panglingsir, panguntat paruman malih.

## Pawos 18

- (1) Sajeroning Paruman Desa, Bandesa Adat patut nyobihang pamargin ngenterang desa, pamekas ngenenin indik :
  - ha. Munjuk lungsuring pakraman saha ayah-ayah, sulur arta berana, druwen desa;
  - na. Pidabdab Prajuru ngenenin usaha desa kapungkur.
- (2) Pamutus paruman desa sinanggeh pararem, maka pamitegep pamargin Awig-awig.
- (3) Saluwiring Pararem patut kasurat manut galah, nomer, tur daging sane kasungkemin.

## Pawos 19

- (1) Sangkepan Prajuru Desa ngawedarang rarincikan usaha desa kapungkur.
- (2) Sangkepan Prajuru utawi Dulun Desa tan dados ngamedalang tategenan ring krama sadereng kaingkupin antuk krama Desa.
- (3) Pamutus sangkepan Prajuru utawi Dulun Desa ngewetuang paswara, maka daging pituduh sang ngewetuang utawi ngonekang pecak pararem krama desa.

## Palet 5

### Indik Druwen Desa

## Pawos 20

- (1) Padruwen Desa Adat Lebah sekadi ring sor :
  - ha. Kahyangan Desa, luire :
    1. Kahyangan Tiga : inggih punika Pura Desa/Bale Agung, Pura Puseh kanton ring Bale Agung lan Pura Dalem kaduwenang lan kasungsung antuk kalih Desa adat : Desa Adat Lebah lan Desa Adat Bukit mapesengan Pura Dalem Lebah-Bukit.
    2. Pura Dalem Lebah-Bukit kasungsung antuk kalih Desa Adat inggih punika Desa Adat Lebah lan Desa Adat Bukit.
    3. Desa Adat Lebah boya nenten nuwenang kahyangan Desa sakawenten maka sami punika sampun kaempon olih soang-soang pangempon muang panyungsungannyane, mawanan prabeaya sane kawedarang boya saking Desa

Adat nanging saking pangempon/panyungsungnyane sane mekrama desa ring desa Adat Lebah taler wenten saking desa siwosan, luwir ipun Pura Subandar, Pura penyiwian, Pura Subak, lan sane siosan.

- na. wantilan ring Pura Dalem kaduwenang sareng kalih Desa Adat Lebah lan Bukit
- ca. Lelanguan minakadi tetabuhan lan ilen-ilen padruen Desa Adat luire :
  1. Gong (seperangkat gong)
  2. Ilen-ilen Wali pura : rejang tumpeng lan pendet dangsil
  3. Likita-likita luire : pipil krama, awig-awig, paswara/pararem
  4. Pelawatan Ida Batara, satunggil kalih warsa ngiring Ida Batara ke pura Dang Kahyangan Candi Gora petirtaan ke Telaga
  5. Lembaga Perkreditan Desa (LPD)
  6. Setra-setra

(2) Olih-olihan Desa Adat Lebah, luire :

- ha. Urunan Krama Desa Adat;
- ca. Paica saking Guru Wisesa;
- ra. Dana punia tiosan, sane patut.

#### Pawos 21

- (1) Prajuru Desa patut ngetangang pamupon laba Pura lan sapenunggalan druwe Desa.
- (2) Pikolih lan pamuponnya keanggen prabeya piodalan saha wewangunan ring pura miwah anggen kabuatan Desa Adat.
- (3) Ring sangkepan Desa, Prajuru pangamong druwe desa ngawentenang parindikan munjuk lungsuring padruwen desa ring krama desa.
- (4) Sakaluring druwe desa patut weenten ilikitannya.
- (5) Tan kalugra ngadol utawi ngesahang padruwen Desa yan tan kasungkemin antuk krama desa.

Palet 6

Sukerta pamitegep

Kaping 1

Karang lan Tegal

Pawos 22

- (1) Krama Desa Adat pengemong tegalan, kebun miwah taman (tanah tan keni tigasana) patut ngawatesin karang inucap antuk pagehan/ turus utawi tembok mangda pekantenanya asri.
- (2) Krama Desa Adat sane ngamong karang paumahan patut kawatesin pagehan/ turus utawi tembok luire :
  - ha. Wates sisi kangin wiadin kaler patut kekaryanin antuk sang ngamong karang sane mawasta gagaleng keluan, tur watese sane kateben manut paingkupan sang kalih sane nuwenang wates inucap.
- (3) prade kerasayang pagehan utawi turus inucap ngelikadin, yan pada arsa penyandinge, kengin watese ngangge pinget kewanten kesaksi antuk prajuru Desa utawi pracihna pal saking Agraria.
- (4) Sang ngamong karang patut miara watese sane kauh miwah kelod, rah punika sane mewasta gagaleng kateben.
- (5) Prade wenten karang kebebeng mangda keutsahayang wenten marginnyane.

Pawos 23

- (1) Sinalih tunggil Krama Desa Adat utawi Banjar Adat tan kalugra :
  - ha. Ngalah-alah margi, tegal, karang paumahan;
  - na. Ngalah-alah tanah tegak Kahyang, Setra, lan sekancan tegak sinanggeh suci
- (2) Prade wenten sekadi ring ajeng, sang ngalalah patut ngawaliang tanah inucap saha pamidanda sapatutnya kedulurin upakara ring pengelalah tanah suci.
- (3) Krama desa nenten kedadosang ngadol tanah lianan ring meagama hindu, sapunike taler ring krama dura negara tur sane numbas patut ngeranjing krama mipil. Sapasira sane mamurug keni danda manut pararem
- (4) Krama sane jagi ngadol tanah mangdane kauningin olih Bandesa adat

Kaping 2  
Papayonan

Pawos 24

- (1) Ngawit nandur papayonan tanem tuwuh patut adepa agung ngajeroang saking wates, prade jantos ngaliawat wates wenang kasepat gantungin.
- (2) Yening wenten pepayonan ngukulin, semaliha mewastu mayanin kepisaga patut kewara antuk paiguman ping ajeng prasida sang nruwenang wit ngerebah utawi notor.
- (3) Prade sampun kewara taler tan wenten usaha sang nruwenang wit sang rumasa katetehan/kejerihan wenang mesadok ring prajuru, tur risampun keparitatas kelugra ngicalang wit inucap.
- (4) Sang keni pamidanda panyangaskara saha prabeya manut pararem marep ring wawangunan sang kerubuhin luire :
  - ha. Sang ndruwenag wit sinanggeh mayanin, prade pungkak ngarubuhin wawangunan krama tios;
  - na. Sang notor, munggul utawi ngarebah taru tur ngarubuhin wawangunan krama tios.
- (5) Krama Desa patut ngamanggehang kawerdin tanem tuwuh sane ngawinan desane asri tur lestari.

Kaping 3  
Wawangunan

Pawos 25

- (1) Nyabran ngawangun patut :
  - ha. Masadok ring prajuru, ping ajeng prade wawangunan nganinin wates;
  - na. Ngangge asta bhumi miwah gagulak kosala-kosali, sanistane manut patitis niskala;
  - ca. Tan ngayubin ke pisaga;
  - ra. Tan dados ngembahang toya ke pisaga.
- (2) Prade wawangunan jantos ngayubin bilih-bilih temboke ring telenging wates, risampun keware tur kasadokang ring prajuru, wenang kedanda manut pararem, saha tembok inucap kegubar utawi sanistane mangda kakaryanang abangan.

Kaping 4  
Wawalungan

Pawos 26

- (1) Sahananing warga desa sane mamiara wawalungan (bawi, risampun mabelas utawi banteng yan sampun masaluk tali), patut sayaga nitenin negul/ngelogor mangda tan ngerusakin karang utawi pabianan krama sewos, bilih-bilih, jantos ngaranjing ngaletihin Kahyangan.
- (2) Prade wenten wawalungan malumbar utawi ngeleb ngerusakin karang/pabianan krama sewos, risampun keware kengin kataban tur kadanda ngawaliang wit sane rusak saha nawur penebas papiaran tetaban anut pengelokikan Prajuru Desa.
- (3) Prade jantos ngaletihin tegak suci minakadi Pamerajan (Sanggah Kemulan), risampun kaparitas antuk Prajuru wenang sang nruwenang kedanda mabuhu agung tebasan prayascita, durmanggala utawi Panca sata iwak bebek belang kalung rapde jantos ngeletihin Kahyangan Tiga utawi Pura Dadya.
- (4) Ring wewidangan Lebah nenten dados memburu luire burung lan di segara nenten dados nejuk ulam nganggen sarana bius luire portas sane mamurub keni sanksi manut pararem.

Kaping 5  
Bhaya

Pawos 27

- (1) Parindikan bhaya luire : jiwa bhaya, artha bhaya, kepondungan) geni bhaya, toya bhaya, ripu bhaya, duracara ring agama.
- (2) Sang manggihin kahanan panca bhaya, patut nepak kulkul bulus mapitulung manut pawos 15 (2) aksarana na.
- (3) Prade ring desa kahanan jiwa bhaya, patut desane ngawentenang bhuta yadnya tur sang mayanin katur mayanin ring sang ngawe wenang.
- (4) Prade wenten jadma mamisuh utawi nguman-uman jadma tios, kakeninin pamidanda beya pecamil tebasan pemrayascita.

## Pawos 28

- (1) Sang manggihin kehanan artha bhaya (kepandungan), patut ngulkul mapitulung anut ring pawos 15 (2) aksara na, utawi sang kemalingan atur supekta ring prajuru utawi Dulun Desa sane pacang nandanin saha mawuwuh penyanggaskara prade wenten jadma ngemaling barang sinanggeh suci.
- (2) Pratingkahe mapailon ring dusta kebawos ngukubin corah, utawi prade wenten jadma manggihin maling tan nyadokang ring prajuru jantos jadma seyos nyaduang, patut kadanda kadi dandaning maling, sekueh pengargan wit manut cacakan, tur prade jantos ping tiga melaksana asapunika wenang kasukserah ring sang ngawe wenang.
- (3) Prade wenten jadma ngerereh reramon, minakadi daun kelapa, ron, miwah sane siyosan tan pasadok ring sang nuwenang, prade kacunduk (ketara) patut kadanda kadi dandanig maling.
- (4) Yening wentena Jadma ngaranjingin pakubon wiadin pakarangan anak sios rikala suwung, tur tanpawangsit mawasta sang madruwe karang kaicalan, wenang jadma inucap dados kesinanggeh mamaling saha patut madewa saksi ring pura Desa utawi Bale Agung.
- (5) Mangda tan kasinanggeh manut ring ajeng, asing-asing ngeranjingin kubon jadma sios patut:
  - ha. Matenggerean (makaukan);
  - na. Nyantos sang nruwenang karang rauh utawi masadok ring pengapit pinih tampek, maka buatan pengeranjinge;
  - ca. Pamedal karangnya kadagingin sawen, maka cihna wenten pangarah rikala suwung.

## Kaping 6 Panyanggran Banjar

### Pawos 29

Krama Desa rikala ngawentenang karya suka-duka, patut kasanggra antuk banjar manut pararem.

Kaping 7

Investor

Pawos 30

- (1) Sinunggil investor (pengusaha) sane jagi pacang nangun usaha ring wewidangan desa adat Lebah patut ngerereh rekomendasi sakeng Bandesa adat
- (2) investor sane ngeranjing ring wewidangan desa adat Lebah kekenian punia manut pararem

## CATURTHAS SARGAH

## SUKERTA TATA AGAMA

Palet 1

Indik Dewa Yadnya

Pawos 31

- (1) Palingih Panyiwian Desa Adat Lebah luire:
  - ha. Kahyangan Jagat miwah Dang Kahyangan;
  - na. Kahyangan Tiga : Pura Desa utawi Bale Agung Desa Adat Lebah, Pura Puseh, kantun asiki ring Pura Bale Agung, Pura Dalem Lebah-Bukit sane nyungsung sareng kalih (2) Desa inggih punika Desa Adat Lebah sareng Desa Adat Bukit.
  - ca. Pura Subandar, Pura Subak Abian Yeh Kaang lan Pura Subak Abian Tongtongan.
- (2) Rahina piodalan soang-soang Kahyangan inucap, kadi ring sor punika:
  - ha. Ring Pura Subandar rikala rainan kapat
  - na. Ring Kahyangan Tiga, luire :
    1. Pura Desa/Bale Agung, rikala rainan Purnama Kelima
    2. Pura Puseh rikala piodalan ring Pura Desa/Bale Agung
    3. Pura Dalem rikala rainan tilem ketiga
    4. Pura mrajapati rikala ring rainan manis kuningan
  - ca. Pura Subak Abian Yeh Kaang, rikala rainan Purnama
  - ra. Pura Subak Abian Giri Lestari Mekar Sari, rikala rainan Purnama

- (3) Pengaci ring pura inucap manut kecap sastra agama, saha kelaksanayang nista, madya, utama nganutin kawenten lan perarem ring soang-soang inucap.
- (4) Sahananing prabea sane kawentenang ring Pura inucap kamedalang antuk krama Desa Pangemong utawi pengempon soang-soang Pura manut dresta miwah pararem saking krama pengempon soang-soang.
- (5) Ritatkala wenten wali/karya kahyangan tiga krama/paibon, sanggah, panti nenten kelugra nyarengin upakara/pujawali.
  - ha. Ngawit ngemargiang yadnya krama siosan ring wewidangan Desa Adat Lebah nenten kadadosang nyarengin upakara kinucap luire Dewa yadnya, Manusia yadnya, Pitra yadnya, Rsi yadnya, lan Bhuta yadnya selami pemargin yadnya ring Desa Adat Lebah durung mawasta puput.
  - na. Ring Pemargi yadnya kinucap nenten kadadosang ngewentenang kelecan (tajen) sane mamurub keni sanksi manut pararem.

#### Pawos 32

- (1) Ring soang-soang Pura inucap kawentenang Pamangku.
- (2) Ngadegang Pamangku manut dudonan:
  - ha. Turunan utawi ngewaris (Preti sentana sane keselang widhi)
  - na. Nyanjan utawi nuur, mapiteges mapinunas ring ajeng penataran Pura
  - ca. Sane kapilih pratisentana keturunan Pamangku sane kantun tunggal waris/pasendetan utawi tunggal dadia olih krama Desa Adat.
- (3) Tan kawenangan ngangge pamangku, luire:
  - ha. Cedangga, luire peceng, perot, cungh lan sapenunggilannya;
  - na. Sang sapisira ugi sane tan kapatutang anut pararem;
  - ca. Sakit gila, ayan, buduh, miwah sakit tan sida katambanin;
  - ra. Sane madrebe pari laksana tan becik.
- (4) Prabea Kapamangkuan :
  - ha. Ngawintenin pamangku kamedalin saha kalaksanayang antuk sang ngadegang, mekadi krama desa utawi pengempon pura soang-soang;
  - na. Yening wenten Pamangku Adat sane mantuk, indik pitra yadnya dados swadharman krama adat lan kaluwargannyane, akeh prabea sakeng adat manut pararem
- (5) Pamangku patut ngemanggehang miwah agem-ageman Pamangku.

### Pawos 33

(1) Swadharma pamangku luire :

- ha. Ngenterang upacara piodalan ring kahyangan utawi ring soang-soang pakubon krama;
- na. Tan wenang salab-sulub, yan mamuruh wenang pamangku wenang pamangku inucap nyepuhin raga;
- ca. Prade salah sinunggil pamangku kapialang utawi cuntaka, kengin nyelang pamangku kahyangan tiga siosan;
- ra. Semalih yan sampun pamangku ngayah tigang rahina ring pura kancit wenten kulawaganya utawi pisaga pengarep lina, pamangku inucap tan keneng cuntaka, sakewanten pemangku tan budal (mantuk ke jeroanya) selami piodalan;
- ka. Pemangku kahyangan tiga patut wenten ngewekasang bakti krama ritatkala rainan galungan lan kuningan saking ngawit semeng ngantos jam 12.00 siang;
- da. Pemangku sane wenten ring wewidangan adat lebah wajib ngayah ritatkala ngemargiang pujawali utawi ritatkala piodalan.

(2) Petias utawi olih-olihan pamangku, luire:

- ha. Penyolasan miwah sarin canang;
- na. Luput pekaryan lan luput papeson;
- ca. Olih-olihan siosan ring punika lan sastra ka manut pararem.

### Pawos 34

(1) Pamangku kagentosin riantukan :

- ha. Lina;
- na. Pinunas ngaraga, menawi kegeringan lan sapanunggalannya;
- ca. Kawisan antuk krama menawi melaksana sane tan patut (asta dusta).

(2) Prade pamangku kawusang sangkaning melaksana asta dusta, keni pamidanda manut pararem.

## Pawos 35

Kasukertan Kahyangan ring Desa :

- (1) Sane nenten kalugra ngranjing ka pura luire :
  - ha. Sang katiba cuntaka, makadi sebel ngeraga :
    1. Sebel kandel, ngeraja sewala, salami dereng mebersih;
    2. Sebel madrue putra, sajeroning 42 rahina, krukun;
    3. Sebel pangantenan, sadereng mabiakala;
    4. Cuntaka sangkaning kapademan manut senger.
  - na. Sang panten miwah anak babinjat sadereng maupakara;
  - ca. Makta sahananing saneh kasinanggeh ngaletihin;
  - ra. Wawalungan suku pat, sejawaning ritatkala mapapada;
  - ka. Mabusana sane tan manut kadi tata caraning ngranjing ka pura;
  - da. Anak alit saderengmayusa tigang sasih;
  - ta. Sadereng polih wak-wakan (pituduh) prajuru Desa adat.
- (2) Busana ngranjing ka pura wenang nganutin dresta minakadi :
  - ha. Ritatkala ngaturang ayah, mawastra lan nyelempot;
  - na. Ritatkala ngaturang sembah, mabusana jangkep;
  - ca. Siosan kadi ring ajeng nenten kalugra, sajawaning sampun pituduh prajuru.
- (3) Parilaksana tan kawenangan ring pura, luire :
  - ha. Mabawos sane kasinanggeh wak parusya, wak capala;
  - na. Makoratan/mabacin, mawarih, masanggama;
  - ca. Masumpah utawi macaron;
  - ra. Ngias raga sajawaning pandita miwah pinandita
  - ka. Mungghah tedun palinggih sajawaning pituduh prajuru desa;
- (4) Sang mamurug kadi kecaping ring ajeng, keni pamidanda pamerayascita sepatutnyane.

## Pawos 36

- (1) Yan wenten jadma kerawuhan ring pura, kengin patut katatasang prade rumasa kesumangsayan, yan tan wiakti jadma inucap kasisipan manut pararem.
- (2) Prade Kahyangan kahanan dur manggala, minakadi kepanca bhaya pemangku patut digelis nyadokang ring prajuru mangda marumang krama desa tur ngawentenang upakara sepatutnyane.

Palet 2

Indik Rsi Yadnya

Pawos 37

- (1) Sang pacang madeg pandita utawi madwijati patut mesadok ring Prajuru Desa kalih Parisada Hindu Dharma Indonesia (PHDI).
- (2) Prajuru Desa patut nitenin tur wenang ngalengin, prade wenten kacihnanlempas ring kakecap miwah dresta.
- (3) Sang dwijati polih laluputan ayahan lan papeson.

Pawos 38

- (1) Sang sulinggih patut ngeriyinang ngayunin ring wawidangan desa sesampune wawu muputang yadnya ke jebar jagat utawi ke Dura Desa.
- (2) Krama Desa sami patut sareng nitenin katuntun antuk Prajuru, mangda sahananing yadnya sane kawentenang kaicen pamuput olih pandita.

Palet 3

Indik Pitra Yadnya

Pawos 39

Dudonan pamargin pitra yadnya

- (1) Pangupakaran sang lina :
  - ha. Antuk mendem utawi ngeseng, makacihna pakingsan ring Ibu Pertiwi utawi ring Bhataran Brahma, salami nuptupang prabeya.
  - na. Maupacara pangabenan utawi palebon.
- (2) Upacara-upacara Pitra Yadnya riwusan keabenang mewastu raris mamukur tur kalanturang ngelinggihang dewa pitara.

## Pawos 40

Swadharmaning lan tetegenan krama prade wenten sinalih tunggil warga lina :

(1) Sang kaduhkitan patut :

ha. Nyadokang ring Klijan tur nunas tetimbangan ring kawentennya;

na. Ngaturin Banjar mangda mekarya eteh-ete sawa kedulurin panyembrama antuk canang sakasidan

(2) Swadharmaning Banjar/Desa :

ha. Kelian Banjar maritatas pamargin sang kaduhkitan, napike pacang kapendem, makinsan riyin utawi lantur keabenang;

na. Prade kapendem, raris kawentenang kulkul patahu manut pawos 15 (3) aksara na, antuk Kelian Banjar utawi wakilnya.

ca. Penyangran Banjar selanturnya :

1. Soang-soang krama Banjar nedunang patut manut pararem;

2. Ngaryanin eteh-ete sawa;

3. Sami Krama Banjar ngater ke setra jantos pamendem puput;

4. Tan kengin ngelelet langkungan ring 7 (pitung) rahina, tur patut polih gebagan anut paetengan kelian banjar;

5. Tan kalugra nginepang bangbang

6. Tan kalugra nyekeh layon langkungan ring awarsa.

(3) Pengabenan kepurusan, pengabenan pedadian kalaksanayang sanistanane 10 (dasa) warsa.

(4) Prade wenten lina, rikala piodalan ring pura, kengin mendem tan pasadok tur memargi wengi.

(5) Pamargin pamendeman utawi palebonan mangda nganutin sastra agama lan dresta.

## Pawos 41

(1) Saneh kasinanggeh kacuntakan sakadi ring sor :

ha. Cuntaka antuk lina;

na. Cuntaka antuk ngaraja sewala;

ca. Cuntaka antuk ngembasang putra

ra. Cuntaka antuk karuron;

ka. Cuntaka antuk pawiwahan;

- da. Cuntaka antuk gamia gamana;
- ta. Cuntaka antuk salah timpal;
- sa. Cuntaka antuk yening wenten anak istri mobot nenten kaupakarain pabiukawonan tur pawidiwidanan;
- wa. Cuntaka antuk mamitra ngalang;

(2) Sengker cuntaka manut kawentenannya :

- ha. Cuntaka kalayu sekaran, cuntakanya kantos masesapuh manut dresta;
- na. Cuntaka ngaraja swala, 3 rahina ngawit saking ngeraja swala utawi selamananing ngaraja swala;
- ca. Cuntaka ngembasang putra, 42 rahina (abulan pitung dina) ngawit saking putrane embas utawi ngantos sampun kaupakara makekambuhan tur meprayascita manut sakadi agama, lanang wiadin istri.
- ra. Cuntaka karuron abulan pitung dina (42 rahina) tur sampun meprayascita.
- ka. Cuntaka pawiwahan, cuntakanya ngantos sesampune maupakara makala-kalaan
- da. Cuntaka gamia gamana, cuntakanya ngantos sesampune kepalasang/masepihan tur sampun kawntenang pemrayascita desa adat/kahyangan
- ta. Cuntaka salah timpal, kapuputang sekadi ring Agama Hindu tur dresta/Adat.
- sa. Cuntaka anak istri mobot sangkaning lokika sangraha nenten kawntenang upakara pabiakaonan, cuntakanya ngantos kewntenang upakara pabiakaonan;
- wa. Cuntaka memitra ngalang, cuntakane ngantos kewntenang upakara pabiakaonan pamrayascita;
- la. Ngembas putra nenten kawntenang upakara pawidi widana, cuntakanya ngantos wenten sane mameras sang putra, tur sampun kawntenang upakara sekadi ring pawarah-warah Agama Hindu.

(3) Cuntaka kelayu sekaran utawi kepademan :

ha. Kapendem (Mekinsan ring pertiwi) cuntakania :

1. Cuntaka/sebel ke banjar rauhing 3 rahina riwusan mendem utawi sesampun polih prayascita (mesapuh)
2. Cuntaka/ ring keluarganya ngantos 42 rahina (ebulan pitung dina)

na. Mekinsan di geni, cuntakania selami 12 rahina

ca. Mekinsan di geni nuur Ide Pedanda, cuntakania nganutin pangendikan Ida Pedanda

ra. Kaaben cuntakanya :

Sang nyambut karya pitra yadnya cuntakania ngawit saking ngerancang karya rauh riwus yadnya (mapapegat)

- (4) Tan keneng cuntaka luire :
- ha. Sang sulinggih
  - na. Pamangku kahyangan tiga rikala piodalan

Pawos 42

Atiwa-tiwa utawi pangabenan kamargiang madasar antuk sastra agama miwah dresta.

Pawos 43

- (1) Papatusan pangabenan manut dresta lan pesedikaraan
- (2) Pemargi laksana pangabenan wenten :
  - ha. Ngaben pedadian/rombongan kapurusan sanistane satunggil 10 (dasa warsa), nekikan upakara taur Agung ring Pura Besakih.
  - na. Ngaben nuka putus lan panginyune manut dresta pesedikaraan.
  - ca. Ngaben dadakan, pateh sekadi patus lina kapendem.
- (3) Sajeroning panglaksana pangabenan krama banjar patut ngewantun manut perarem, asak dana artha lan dina laksana (ngayah).

Palet 4

Indik Manusa Yadnya

Pawos 44

- (1) Manusa yadnya inggih punika upacara-upacara dharmaning kauripan manusa, ngawit saking patemoning kama bang lan kama petak sajeroning garba ngantos, kelayu sekaran riwekas.
- (2) Upakara kadi ring ajeng medudonan sekadi ring sor :
  - ha. Magedong-gedongan duk pengerempinian ibiang;
  - na. Duk sang rare medal;
  - ca. Kepus udel;

- ra. Roras rahina;
  - ka. Tutug kambuhan (42 rahina);
  - da. Tigang sasihin ( 3 bulan);
  - ta. Pawetuan/oton/odalan (6 bulan);
  - sa. Tutug kelih (ngeraja sewala sane wadon, ngembakin sane lanang);
  - wa. Metatah/mepandes;
  - la. Mawiwaha;
  - ma. Mawinten;
- (3) Upacara-upacara inucap kemargiang nista, madia, utama manut sastra agama miwah dresta.

#### Palet 5

#### Indik Butha Yadnya

#### Pawos 45

- (1) Butha yadnya inggih punika upacara-upacara merupa : byakala, caru, labaan aci lan pakelem miwah sane siosan.
- (2) Upacara pabyakala ring pertiwi, kahyangan lan bebhutan kewastanin mecaru.
- (3) Pacaruan inucap ring ajeng nista, madia, utama manut wiguna kadi ring sor.
  - ha. Eka Sata
  - na. Panca Sata
  - ca. Panca Sanak
  - ra. Resi Gana
  - ka. Panca Kelud
  - da. Tawur
  - ta. Tawur Agung
- (4) Sajawaning kadi ring ajeng kawentenang upacara :
  - ha. Mabanten utawi jotan saiban wusan maratengan
  - na. Mesapuh-sapuh rikala pacang wali ring pura

## Pawos 46

- (1) Nangken ngewarsa rikalaning Tilem Kesanga kawentenang Caru Kesanga, kelanturang Ngerupuk, makacihna pacang mapag rahina penyepian benjangne.
- (2) Bratha penyepian sane kemargiang antuk Krama Desa :
  - ha. Amati geni : tan kengin meapi-api;
  - na. Amati karya : tan kengin nyambut karya;
  - ca. Amati lelungan : tan kengin maoneng-oneng, masuara gora, lan sapanuggalannya
  - ra. Amati lelungan : tan kengin melelunganan merika-meriki
- (3) Peberataan inucap kemargiang sakeng semeng ngantos ngedas lemah
- (4) Sang mamurug kecaping ajeng keni pamidanda manut pararem ring banjar/tempek soang-soang kemargiang antuk petilik (Pecalang Desa)
- (5) Riwus rahina Nyepi (benjangne) maka cihna pengawit I çaka Warsa patut soang-soang warga desa sami saling ngaksama (Dharma santi).

**PANCAMAS SARGAH  
SUKERTA TATA PAWONGAN**

Palet 1

Indik Pawiwahan

Pawos 47

- (1) Pawiwahan inggih punika patemoning purusa pradana, melarapan penunggalan kayun suka cita kaduluring upasaksi sakala-niskala.
- (2) Pemargin pawiwahan luire :
  - ha. Papadikan, kemanggalaning antuk pekerunan;
  - na. Ngerorod, merangkat riyin wawu kekrunayang;
  - ca. Nyeburin, utawi nyentana nyeburin risampun kemanggala antuk upacara pamerasan.
- (3) Pidabdab sang pacang mawiwaha patut :
  - ha. Sampun manggeh daha-teruna;
  - na. Sangkaning pada lila (tan kepaksa);
  - ca. Kemargiang sudi wadani prade pengambilan tios agama.
- (4) Pamargin pawiwahan mangda nganutin Undang-Undang Perkawinan saking sang Ngawewenang.

Pawos 48

- (1) Pawiwahan sane kepatutang ring Desa sekadi ring sor :
  - ha. Sampun kemargiang pekala-kalan utawi pesakapan kesaksinin antuk tri upasaksi inggih punika manusia saksi, butha saksi, lan dewa saksi;
  - na. Prajuru patut mepakelingang utawi ngalikitayang pawiwahan;
- (2) Pawiwahan sane ten manut kadi ring ajeng sinanggeh tan pastika.

Tata caraning perabian :

- (1) Sapa sire ugi pacang ngewarangan pakulawargan patut mesadok ring prajuru, selanjutnya prajuru maritatasang, manut tan manut indik perabiane;
- (2) Pemargian pepadikan anut dudonan :
  - ha. Pakerunan jantos ping tiga, saha soang-soang melarapan :
    1. Kapertama antuk sedah woh;
    2. Kaping kalih antuk sedah woh ring sajeng;
    3. Kaping tiga antuk tipat bantal, kebawos pemuput pepadikan.
  - na. Risampun mepragat raris sang istri keajak budal ring pakubon sang lanang, saha kelanturang antuk pabyakala.
  - ca. Mangda pragat tumus sekala-niskala, raris kulawarga purusa makta pejati ring merajan wadone.
- (3) Prade ngerorod utawi merangkat patut :
  - ha. Reraman lanangengewentenang pengelukuan/pejati antuk duta saksi paling kedik 2 (kalih) diri.
  - na. Genah atene tan kengin ring pakubon sang lanang sedereng mebyakala.
- (4) Sajeroning pakerunan/pengelukuan patut :
  - ha. Kemanggala sakeng ramarena purusa antuk gengpangampura majeng ring ramrena wadone.
  - na. Kaigumang bawos indik-indik pakidih utawi pelegayan arep ring pasewakan sang ngidih saha dewasa pekrabkambeyane wekas.
  - ca. Kecihnayang indik kapurusa utawi prade sentana rajeg kajejerang kapatutang ngidih anak lanang sane kebawos pawiwahan nyeburin, tur risampun sulur pemerasan ketegepin kemanggehang sentana nyeburin.
  - ra. Prade tan terima pengelukuan pejati, tan keterima pakurenan kemargiang jantos ping tiga.
- (5) Pekarabkambean mapiteges upakara galang apadang (patut) mapikuren duaning sampun manut sekadi dudonannyane manut sastra agama lan dresta.

## Palet 2

### Indik Nyapian

#### Pawos 50

- (1) Pawiwahan prasida kawusang melarapan antuk palas merabian utawi kepademan.
- (2) Wusan mapikurenan riantukan salah sinunggil lina mapiteges balu, mekadi balu lanang utawi istri.
- (3) Palas merabian inggih punika sangkaning mawiwit wicara.
- (4) Sang ayat palas merabian patut atur supeksa pailikitan riyin ring sang rumawos (pengadilan negeri) wastu tinas apadang pemutuse kebawos nyapian, wawu prajuru/dulu nyiarang kewentenannya ring desa saha keni pemelin kulkul manut pararem utawi manut dresta.

#### Pawos 51

- (1) Tata cara palas merabian sekadi ring sor :
  - ha. Nawur prabeya pesaksi sinalih tunggil sami matenga;
  - na. Pagunakayan polih pahan pada;
  - ca. Pebekel, tadtadan soang-soang kekuasang niri-niri, sakewanten indik warisan kekuasang antuk purusa;
  - ra. Ngawuruhin miwah ngupajiwana pratisentana manut swadarmaning guru rupaka;
  - ka. Nawur pamidanda penumbas kulkul manut pararem utawi manut dresta;
  - da. Ngelung jinah bolong manut logika prajuru/dulu utawi manut dresta;
  - ta. Mepamit saking merajan sang lanang.
- (2) Prade riwekas sang palas kecihna adung malih, patut :
  - ha. Ngemargiang pawiwahan malih
  - na. Kedanda nikel saking palase

## Pawos 52

- (1) Sang balu kebinayang dados :
  - ha. Balu luh wit sentana (sentana rajeg) miwah balu luh boya sentana;
  - na. Balu muani kepurusa (wit sentana) miwah balu muani nyeburin (boya sentana).
- (2) Swadharmaning balu inucap patut :
  - ha. Ngemanggehang patibrata tan patut ngamargiang paradara/drati krama;
  - na. Nguwasayang waris gunakaya, tan dados ngadol, ngadeang, makidihang tan siosan punika, sejawaning kebebasan sakeng pianak utawi kulawarga pinih tampek sakeng rabine prade okane kantun alit-alit;
  - ca. Kengin ngidih sentana prade wenten kecumpuin antuk kulawarga sinanggeh kepurusa;
  - ra. Kawenangang mawiwaha malih, prade wenten kebebasan saking warga kapurusa.
- (3) Balu keucap tan pageh sekadi ring sor :
  - ha. Drati krama utawi paradara;
  - na. Matilar saking pakubon tan pesadok jantos 6 (enem) sasih;
  - ca. Lempar ring swadarma sewos-sewosan tan prasida ngesehin solah maprewerti marep ring pituduh kaluwarga purusa.

## Palet 3

### Indik Sentana

## Pawos 53

- (1) Sentana wenten kalih pawos, sane keucap pratisentana miwah sentana peperasan.
- (2) Pratisentana inggih punika sentana sane metu saking pawiwahan kepatut.
- (3) Prade pawiwahan tan ngewetuang sentana kengin ngidih sentana antuk upasaksi sekalaniskala sane kewastanin sentana peperasan.
- (4) Prade pawiwahan tan kapatut ngewetuang sentana, mangda tan kantun kewastanin bebinjat utawi astra, patut kemanggala antuk penyangaskara.
- (5) Sentana rajeg inggih punika, pratisentana wadon (pradana) sane kemanggehang lanang (purusa) tur risampun ngelaksanayang pawiwahan, nyeburin.

- (6) Sang sane kearsayang sentana rajeng inucap wiwit (5) inggih punika :
- ha. Pratisentana wadon tunggal utawi salah sinunggil pratisentana wadon yening makesami pratisentana wadon;
  - na. Sampun kemanggehang dados pratisentana (purusa);
  - ca. Kapawiwahan keceburin keutamayang antuk jadma sane meagama Hindu utawi jadma sane meagama siosan sane sampun ngelaksanayang pamarisuda raga utawi sudi wadani;
  - ra. Sane ngemanggehang sentana rajeg patut mapesadok ring Prajuru Banjar Adat tur kelian Banjar patut nyiarang ring banjar saha ngaturang ring prajuru Desa Adat.

#### Pawos 54

- (1) Ngamanggehang sentana manut dudonan patut makacihna artha berana pemerasan sane kesaksiang sakala-niskala.
- (2) Sapa sira ugi krama pacang ngidih sentana, patut mesadok ring Bandesa senistane asasih sedereng pemerasan.
- (3) Bandesa kewakilin antuk kelian-kelian banjar nyiarang ring sewidangan desa, sang sapa sira ugi rumasa tan lila mangda nguningang masengker kalih wuku sedurung pemerasan, ring Bandesa adat.
- (4) Prajuru utawi Dulu desa digelis mawosin saha ngicenin pemutus nepek ring catur dresta miwah pararem.
- (5) Prade sulur paperasan tan manut ring kecaping ajeng, Prajuru utawi Dulu desa wenang, ngandeg sang pacang mekarya saha ngicenin pemutus, mangda kepuputang riin bebawosan sulur utawi wicaranya.

#### Pawos 55

- (1) Paperasan sane kepatut ring desa risampun ring desa risampun makacihna :
  - ha. Widhi widana pemerasan;
  - na. Kesaksinin antuk prajuru desa sane makelingang utawi ngalekitayang;
  - ca. Kesiarang ring wewidangan desane.
- (2) Sane kepatut peras angge sentana kadi ring sor :
  - ha. Jadma meagama Hindu;

- na. Kaluwarga saking purusa, prade ten wenten kengin saking wadon yening taler tan wenten wawu kengin sekama-kama (sekita kayun);
  - ca. Keutamayang saking waris pancer kapurusa;
  - ra. Sinalih tunggil mawiwit saking kulawarga tunggal sanggah utawi merajan, paibon, lan dadia utawi ngambil anak tios sakewanten sang meagama Hindu.
- (3) Kengin ngangkat sentana langkung ring adiri, lanang wiadin wadon.

#### Palet 4

#### Indik Warisan

#### Pawos 56

- (1) Warisan inggih punika arta berana saha ayah-ayahan ngupadi sukerta sakala-niskala saking keluhurannya marep ring turunannya.
- (2) I kang sinanggeh warisan luire :
  - ha. Due tengah, mekadi tegal ayahan desa sanggah/merajan, pusaka lan sane siosan;
  - na. Pagunakayan, tadtadan/jiwa dana, hutang piutang.
- (3) Wawu kengin kebawos warisan prade wenten :
  - ha. Sang ngewarisang;
  - na. Keturunan (ahli waris);
  - ca. Arta berana, tetegenan (ayah-ayah) makacihna warisan.

#### Pawos 57

- (1) Ahli waris, luire :
  - ha. Pratisentana purusa;
  - na. Pratisentana (sentana rajeg);
  - ca. Sentana peperasan lanang/wadon;
- (2) Prade tan wenten sekadi ring ajeng, kasinanggeh ahli waris :
  - ha. Turunan purusa pernah ngunggahang makadi rerama lanang, pekak selanturnya, rerama misan, mindon;

- na. Turunan purusa pernah kesamping mekadi keponakan, keponakan dimisan miwah keponakan dimindon.
- (3) Swadarmaning ahli waris patut :
- ha. Nerima saha nguwasayang tetamian pahan keluhurannya, mekadi ngerempon sanggah/merajan, pura saha pengupakaryannya miwah ayah-ayahan pewaris;
  - na. Ngabenang pewaris saha ngelanturang upacara-upacara pitra yadnya;
  - ca. Naurin hutang-hutang pewaris manut pengelokika.

#### Pawos 58

Mungguwing waris kewaris ring Desa Adat Lebah

- (1) Risampun kelaksanayang Pitra Yadnya lan hutang-hutang pewaris buntas ketawur, wawu warisan dados kepah.
- (2) Para ahli waris sami polih pahan sangkaning, pagunakaya, sajawaning karang/tegal ayahan desa keemong antuk ahli waris kasinanggeh krama ngarep.
- (3) Sinalih tunggil ahli waris kengin tan polih pahan prade :
  - ha. Nilar kawitan lan sasananing agama Hindu;
  - na. Alpaka guru rupaka;
  - ca. Sentana rajeg kesah mawiwaha utawi pratisentana nyeburin soang-soang kabawos ninggal kedaton.
- (4) Boya ahli waris, kengin muponin hasil anut dudonan, luire :
  - ha. Sentana luh, selami durung kesah mawiwaha;
  - na. Balu luh wiadon muani nyeburin (soang-soang boya sentana).
- (5) Pewaris kengin maweweh rikala meurip pinaka jiwa dana, tadtadan/bekel, makacihna paweweh tetep ring oka sane kesah mawiwaha.

#### Pawos 59

- (1) Prade sajeroning pakulawargan wenten ahli waris lingkungan ring adiri patut :
  - ha. Kawentenang paigum indik pahan waris inucap;
  - na. Yan tan prasida ketunasang tatimbang ring prajuru/dulu-dulu;

- ca. Prade taler tan wenten cumpu ring panepas Prajuru, patut kadauhang ring Kertha Desa prade taler tan kacumpuin, kengin katunasang ring sang Rumawos (Pengadilan Negeri).
- (2) Prade karang inucap keputungan, patut prajuru/para Dulu nibakang ring :
  - ha. Sang sinanggeh ahli waris manut pawos 56;
  - na. Sang kengin anggen sentana anut pawos 54;
  - ca. Prade taler tan wenten cumpu ring panepas Kerta Desa kengin ketunasang ring sang Rumawos (Pengadilan Negeri).
- (3) Prade jantos karang desa kepah utawi kasepih, patut soang-soang nedunin makrama desa ngarep.

**SASTHAS SARGAH**  
**NGERAKSA KASUKERTAN PURA LAN PRATIMA**

Palet 1

Indik Kasukertan Pura

Pawos 60

- (1) Tamiu dura negara tan keaturin ngeranjing ke utama mandala
- (2) Salwiring tamiu dura Negara keaturin wantah ngeranjing ke madya mandala atas panugrahan jro Bandesa tur sumangdena mepengangange adat Bali sanistane busana madya
- (3) Sapesira sane mamurug keni dedosan manut pararem.

Palet 2

Indik Kasukertan Pratima

Pawos 61

- (1) Indik Pratima melarapan antuk ngerajegang pratima, kengin jro mangku ngeraksa tur ngelingghang ring jeron jro mangku tur sabilang karya piodalan jro mangku ngiringang ke linggih Ida soang-soang
- (2) Jro Bandesa wenang nureksa kawentenan pratima punika tur wenang nguningayang kewentennanyane majeng ring prajuru penyeledi pungkuran.
- (3) Pemangku pengraksa pratima lepas saking swadharma uger-uger yening prade kebencana geni baya, toya baya, dusta baya lan sesamenipun manut pangloktita prajuru desa sami utamane Saba desa lan Kerta desa
- (4) Sapesira sane mamurug keni dedosan manut pararem.

## SAPTAMAS SARGAH

### WICARA LAN PAMIDANDA

Palet 1

Indik Wicara

Pawos 62

- (1) Sane wenang mawosin makadi mutusang wicara ring desa inggih punika Prajuru Desa sinanggeh Kerta Desa :
  - ha. Kelihan Banjar, pradene sang mawicara sane patunggilan banjar.
  - na. Bandesa Adat, sang mawicara sami-sami ring patunggalan Desa Adat.
- (2) Tata dudonan mawosin saha muputang wicara warga desa kadi ring sor :
  - ha. Kaping ajeng kabawosin antuk Kelihan Banjar;
  - na. Tan cumpu ring panepas Kelihan Banjar katunasang ring panglingsir banjar;
  - ca. Panglingsir Banjar/Kerta Banjar tan kacumponin ketedunang ring paruman banjar;
  - ra. Paruman banjar tan kanutin kengin nunasang ring Bandesa Adat;
  - ka. Bandesa Adat tan prasida muputang katincepang ring panglingsir ring sianggeh Kerta Desa.

Pawos 63

- (1) Sahanan wicara mewiwit kecorahan sakaluire sinanggeh nungkasin daging Awig-awig, pasuaran miwah pararem Desa utawi banjar, Prajuru utawi Dulu Desa patut digelis mawosin tan nyantos pesadok.
- (2) Sejaba wicara kadi ajeng patut nyantosang pesadok sang nunas bawos.
- (3) Panepase patut pastika nyantenang iwang patut melarapan Tri Premana (saksi, lekita, bukti) miwah tan maren nepek ring Catur Dresta.

## Palet 2

### Indik Pamidanda

#### Pawos 64

- (1) Desa utawi banjar wenang niwakang pamidanda ring warga desa utawi banjar sane sisip.
- (2) Paniwak inucap kamargiang olih Bandesa utawi Kelian Banjar.
- (3) Bacakan pamidanda luire :
  - ha. Ayah panukun kesisipan;
  - na. Danda arta (dosa, danda saha panikel-nikelnya miwah panikel-nikel urunan);
  - ca. Rarampangan;
  - ra. Kesepekang;
  - ka. Kewusang mekrama kewaliang pipilnyane;
  - da. Penyanggaskara.
- (4) Pamidanda sane katiwakang patut mesor singgih manut ring kesisipane utamanya ngemanggehang kesudamalan Desa.
- (5) Jinah utawi raja raban pamidanda, ngeranjing dados druwe Desa utawi Banjar.

#### Pawos 65

- (1) Krama sane langkung ring tigang paruman ngelantur tan nawur urunan miwah dadendan wenang kerampag.
- (2) Rarampangan ngangge tata cara kadi ring sor :
  - ha. Kalaksanayang antuk prajuru kasarengin antuk krama Desane seakehne tigang diri maka saksi;
  - na. Sang ngerampag saking darsana ngambil barang utawi nyawenin tanem tuwuh akehnyane manut ring hutang sang karampag;
  - ca. Prajuru miteketang mangda barang-barang sane karampag digelis katebus, masenger awuku ring rahina pacang kaadol;
  - ra. Tan ngeninin saluwir barang sane patut inggilang manut agama miwah mademang pangupa jiwa sang kerampag.

Pawos 66

- (1) Prade sang pacang karampag ngewara (ngalangin) pamargi inucap mawastu sampun tan nganutin awig-awig desa, wenang kasepe kang.
- (2) Semalih yan purun taler ngalangin paridabdab kadi ring ajeng makudang-kudang pasangkepan kaicen patinget tan wenten pamargi sajawaning kawaliang pipil nyane (kauwusang makramé)
- (3) Pamidanda inucap ring ajeng mawasta puput risampun sang kekeninin :
  - ha. Nunas geng pengampura ring krama desa utawi banjar riantukan piwal pasubaya (pararem) pecak;
  - na. Nawur pangargan panguwak pasubaya duk pacang karampag kadulurin parayascita.

**ASTAMAS SARGAH**

**NGUWAH-NGUWUHIN AWIG-AWIG**

Pawos 67

- (1) Nguwah-nguwihin Awig-awig Desa puniki kamargiang antuk paruman Desa.
- (2) Paruman inucap mangda kadasarin antuk pakarsan krama desa Adat yadiastun kamedalang antuk prajuru sinunggal wiadin sinarengan.

Pawos 68

Sakaluwuring sane durung munggah ring awig-awig kejangkepin antuk pararem .

## SANGETYAD SARGAH

### SAMAPTA

Pawos 69

- (1) Awig-awig puniki kawastanin awig-awig Desa Adat Lebah
- (2) Awig-awig puniki kamargiang ngawit kaingkupin utawi kararemin

Pawos 70

- (1) Awig-awig puniki kasungkemin ring paruman duk rahina Buda Paing Uye  
Pinanggal/pang tigang dasa sasih Kasa Caka warsa 1943, tanggal 30 Juni 2021 ring  
Paruman Bale Agung Pura Desa Adat Lebah.
- (2) Awig-awig puniki kalingga tanganin antuk Bandesa, kasarengin Kelian-kelian  
Banjar/Tempek saha kesaksinin antuk Kepala Wilayah miwah Kepala Desa/Perbekel  
Sukadana, saha kakukuhang antuk Bupati/Walikota/Tamadya Tingkat II Karangasem
- (3) Luir sang ngalingga tanganin :

